

Tuesday, March 11, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

CM : DEBT STOCK

Finance Department changtu Chief Minister Pu Lalduhoma'n tun dinhmunah Mizoram sorkarin leiba cheng vbc 12082 leh nuai 26 a nei a ti a, nikum tun ang hun nen khaikhinin tun financial year kal meka leiba chu cheng vbch sang chuangin a tlahniam tih House a hrilh.

Vawiina Assembly session zawhna leh chhanna huna Siaha bialtu MLA Dr.K Beichhua zawhna chhangin, Chief Minister chuan tun dinhmuna Mizoram Sorkar-in leiba a neih zat chu cheng vbc sing 1, sang 2082 leh nuai 26 a ni tih a sawi a. Ba an neihna te chu Market Borrowings atangin cheng vbc 5871 leh nuai 41, sorkar laipui atanga loan an lak atangin cheng vbc 1774 leh nuai 36, NSSF atangin cheng vbc 102 leh nuai 82, Financial Institution leh Bank hrang hrang atangin cheng vbc 954 leh nuai 87, Public Accounts Liabilities atangin cheng vbc 3378 leh nuai 80 a ni a ti a, nikum tun ang hun nen khaikhinin 2024-25 financial kal meka Mizoram Budget Estimate aiin Revised Estimate chu cheng vbc sang 1003 leh nuai 94 in a tlem zawk tih sawiin nikum aiin tun financial year-ah leibat zat chu cheng vbc sang chuangin an tlahniam tih House a hrilh a ni.

Chief Minister chuan MR bill chu lut leh chhuak reng a nih avangin engemawzat an la ba a ti a, an dawn chin chu tun financial tawp hma in an clear vek dawn tih sawiin pension chifel loh tam tak buaipuitu tur ruatin theihtawp an chhuah mek a ti a, lut leh chhuak awm reng anih avangin a vaia an pek zat sawi theih a nih loh thu a sawi bawk.



EXCISE & NARCOTICS MINISTER

Excise and Narcotics Minister Pu Lalnghinglova Hmar-in Mizorama zu hlauhawm nia sawite mihring tana a hlauhawm zia chipchiar taka pholang turin Delhi-a Central Laboratory-ah endik tura hmalak mek a nih thu House a hrilh.

Vawiina Assembly sessiona zawhna leh chhanna hunah Excise Minister chuan Champhai South bialtu, Lt. Col. Clement Lalhmingthanga zawhna chhangin, Aizawl chhehvela zu hmunpui ni-a sawi, Rangyamual, Phunchawng leh Tuikhurhlu-a zu te chu dan phal lohva siam leh zawrh vek a nih thu leh heng zu siam leh zuar te bakah a in te chu dan tlawhchhana man zel an ni a ti a, kumin January ni 20 khan Mizoram Police te nen joint operation neiin mi 150 lai man an ni tih sawiin zu siamna hmun 101 lai tichhia in rakzu litre 1083, zu bilhlai tin 25,556 leh zu bilhna bel lian 96 tihchhiat a ni a ti a, Mizorama zu siamchhuah te chu nunna atan a hlauhawm bik ni-a sawi a awm avangin zu sample chu New Delhi-ah zirchian mek a ni a, result a la chhuak lo tih a sawi bawk.

Excise Minister chuan Assam Rifles nen an thawh hona a tha hle tih sawiin Champhai leh Saitual District chu ruihhlo kalkawng a ni tawh a ti a, ruihhlo lut a tam em avangin an in veng senglo tih a sawi. Minister chuan a senchi lane ti-a sawi, Vaivakawn, Zohnuai pheia zu zawrh titawp turin nikum June thla khan Excise department chu Vaivakawn khawtlang nen tangrualin theihtawp an chhuah hnuah a ziaawm tawh hle a ti a, hetihruah hian a aia hla zawk Rangvamual leh Phunchhawng lamah zu chhe zawk chu thalaiten an in zel tho avangin he thila hmalak dan tur chu ngun taka ngaihtuah ho a ngaih thu sawiin khawpui laili leh hmun pawimawh laia ruihhlo hluar tur chu a theih chin chin an ven thu a sawi a, thalai ruihhlo ngaite hmachhawn dan kawngah ngaihtuahna sen nasat a ngaih thu a sawi bawk.



SCHOOL EDUCATION MINISTER

School Education Department changtu Minister Dr Vanlalhlana'n sawrkar hmasa hunlaia dinhmun sang zawka sikul hlan kai te chu an tlin tawklloh avangin tih danglam ani a ti a, kalpui zel dan tur zirchian mek ani tih a sawi.

He thu hi vawiina Assembly thutkhawma zawhna leh chhanna hunah sawiin Minister chuan sawrkar hmasain khaw hrang hranga School a upgrade chu middle school 48 leh High School 120 ani a ti a, an tihdanglam chhan chu Provincialisation Rules dinglai dan leh dun thenkhat chu heng sikul hlan kai tak te hian an tlin tawklloh vang ani a ti a, kalpui zel dan tur chu uluk taka zirchian mek niin Council of Ministers thutkhawm huna put luh tura dah anih thu a sawi bawk.

Dr Vanlalhlana chuan tun dinhmunah Samagra Shiksha hnuaiah school thar din belh tumna a awm rih lo a ti a, tuna an neih sa thuam that leh sak kal mek muang lutuk umzui lama insawrbing turin hma an la mek tih sawiin bungraw mamawh hrang hrang chu restricted ni lovin tender pangngai chhuah hmanga lei tur ani a ti a, Tunhmaa school lehkhabu lei anih dan titawpin SCERT kaltlanga lei a ni tawh dawn tih a sawi bawk.



MPCC

Mizoram Pradesh Congress Committee chuan Assembly Session kal mekah Chief Minister Pu Lalduhoma'n Lawngtlai West bialtu MLA Pu C. Ngunlianchunga a tawngkhum dan chungchangah Assembly House zahawm zel nan thupha chawi turin an phut thu an sawi.

MPCC thuchhuah tarlan danin Mizoram Legislative Assembly Session kal mekah nimin khan Chief Minister Pu Lalduhoma'n Lawngtlai West bialtu MLA Pu C. Ngunlianchunga chu Anticipatory Bail la tura hrilhin vauna thu a chhak chhuak an ti a. Hetianga mahni MLA puite vauna Chu Assembly Session-ah tunhma a thil thleng ngailo ani tih sawiin MLA ten House chhunga zalenna an neih hmang ngam lo tura vau beh tumnaah an ngai tih sawiin House zahawm zel nan Pu Lalduhoma chuan Pu C. Ngunlianchunga hnenah thupha chawi turin an phut thu an sawi a ni.

Thuchhuah tarlan danin LADC CEM Pu V. Zirsanga chu eiruk thubuaia court in thiam loh a chantir tawh, cheng nuai 4 chawia Kum 4 Jail tang tura hrem mek, bail a chhuah lailawk a ni an ti a. Chief Minister leh ZPM MLA ten

nataka a thlavang an hauh chu Corruption an huat loh zia lan na-ah an ngai tih an sawi bawk.

Nimin Assembly thutkhawm khan Lawngtlai West Bialtu MLA, Pu C. Ngunlianchunga'n Assembly Rorel inkhawma Chief Minister Pu Lalduhoma'n thubuai a neih thu leh bail lailawk la turin hrilh mahse lak a tum loh thu a sawi a, Hemi hnu hian Aizawl Press Club-ah thuhthar thehdarhtute kawmin, Chief Minister in thubuai a neih thu a sawi chungchangah thiam lohna a neih a hriat loh thu leh a tul a nih chuan ram tana jail tan a inhuam tih a sawi bawk.

